

## Lu citrolu

Un jornu trasivu 'ntà 'na putia  
pi accattari un chilu di pira.  
'Na bedda signura prima di mia  
cu la facci bianca cumu la cira  
e li labbra russi comu un piparolu  
a lu putiaru ci dumannà un citrolu.

Si lu pigliassi cu li stessi sò mani,  
si sciglissi chiddu chi ci appatisci  
nun arriverannu mancu a dumani  
sù frischi, viridi e beddi lisci.  
Taliassi chistu, signora Enza,  
è tenniru cu pocu simenza.

Sicuru ca lu sapi quali 'm'av'a dari  
chiddu chi mi duna, pi mia va beni  
di la sò frutta nun c'è di lamintari  
vidu ca avi fudda e c'è lu và e veni.  
Piaci puru a mè cuscina Franca  
dici ca ogni jornu nun ci ni manca.

Ora capivu? Certu, 'nì sugnu sicuru  
chiddu chi dugnu a sò cuscina Franca,  
nun è fora ma dintra a lu scuru  
lu custudisciu comu 'ntà 'na banca.  
Vinissi cu mia ca ci lu fazzu assaggiari  
si ci piaci, a quintali 'nnì po' mangiari.

Lu putiaru cu la signura si 'nnì traseru  
nun curannusi ca lassà a tutti 'n tridici  
tutti li pirsuni ci parsi malu e si nni eru  
ristavu io cu la facci niura comu la pici.  
A stu puntu mi giravu 'ntunnu e taliavu,  
li pira mi purtavu e nun ci li pagavu.

Quannu si mangia troppa carni  
senza 'nà 'nzalata pi cuntornu  
la gula s'attuppa e sù danni  
si resta spissu cu lu fastornu.  
Perciò la 'nsalata nun av'à mancari  
pi nun circari atri radici d'arruttari.

2007 Giuseppe Cardella